

四庫全書

集部

欽定四庫全書

集部

敬軒文集

目錄  
卷一

詳校官編修臣翟 梈

中書臣劉源溥覆勘

總校官庶吉士臣何思鈞

校對官中書臣李斯咏

謄錄監生臣姜士安

欽定四庫全書

集部六

敬軒文集目錄

別集類五明

卷一

賦

古詩

卷二

古詩

歌

卷三

歌行

卷四

絕句

卷五

絕句

卷六

律詩

卷七

律詩

卷八

律詩

卷九

律詩

卷十

律詩

卷十一

雜著

卷十二

書

卷十三

序

卷十四

序

卷十五

序

卷十六

序

卷十七

序

卷十八

記

卷十九

記

卷二十

哀辭

祭文

卷二十一

碑

卷二十二



墓誌銘

墓表

卷二十三

墓表

行狀

卷二十四

箴

銘

贊

章奏

臣等謹案敬軒文集二十四卷明薛瑄撰其門人關西張鼎所編初瑄集未有刊本瑄孫刑部員外郎祺以藁付常州同知謝庭桂雕板未竟而罷弘治己酉監察御史暢亨得其稿於毘陵朱氏鼎又從亨得之字句舛訛多非其舊因重為校正凡三易稿而成書共得

詩文一千七百篇釐為二十四卷鼎自為序  
引朱子贊程子布帛之文菽粟之味二語為  
比殆無愧詞考自北宋以來號為大儒者朱  
子之外率不留意於文章如邵子擊壤集之  
類道學家謂之正宗詩家究謂之別派相沿  
至莊景之流遂以太極圖兒大先生帽子高  
送我兩包陳福建還他一疋好南京等句命  
為風雅嫡派雖羽翼之者大言刼制究不足

以厭服人心明代醇儒瑄為第一而其文章  
雅正具有典型絕不以語錄方言縱情破格  
其詩如翫一齋之類亦間涉理路而大致冲  
澹高秀吐言天拔往往有陶韋之風蓋有德  
有言瑄足當之然後知徒以明理載道為詞  
常談俚語無不可以入文者猶客氣矣乾隆  
四十三年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書



目錄

敬軒文集原序

布帛之文菽粟之味朱子嘗以是而贊程子矣布帛可以常衣菽粟可以常食聖賢著述立言亦猶是也舍此則竒怪隱僻不經於世若左氏浮誇莊周荒唐是已君子所不與焉先師敬軒薛先生有見於此故其著述立言淺近平易使人易知豈竒怪隱僻不經於世者所可擬哉先生名瑄字德溫別號敬軒世為山西河津人自幼篤信好古博學善記所著有讀書錄續讀書錄河汾詩

集行於世惟文集則先生孫前刑部員外郎祺曾託前  
常州同知謝庭桂板刊未就今年夏四月前監察御史  
暢亨先生同鄉謫官陝右道過鎮陽予因訪前集暢曰  
其於毘陵朱氏得之矣予喜而閱之但舛訛非原本矣  
因倣唐昌黎集校正編輯總千七百篇分為二十四卷  
凡三易稿始克成編於戲先生文集流落江南二十餘  
年今傳於世豈非其數有所待與先生永樂庚子河南  
鄉試第一登辛丑進士宣德丁未初授行在廣東道監



察御史正統丙辰擢山東按察司提學僉事陞大理寺  
左右少卿以獄事誥誤閒居七年正統己巳用言官薦  
左遷大理寺丞景泰庚午奉勅總督松潘糧餉事竣陞  
南京大理寺卿未幾改北京大理寺天順丁丑陞禮部  
右侍郎兼翰林院學士入內閣轉左侍郎越五月以疾  
在告懇乞休致通前章三上方得俞允時年六十九矣  
天順甲申夏六月終於家朝廷遣官諭祭為營葬事贈  
禮部尚書謚文清子嘗記先生設教河汾一時及門之

士雲集川滙鼎方十五六先生格言至論耳濡目染猶能憶其一二惜乎少年不及向學大抵先生剛方正大以聖賢為師處已接物不詭隨不屈撓講論經書窮究義理自一身一心推之至於萬事萬物然後約之以歸於一其餘子史百家靡不淹貫究竟至極尤邃於性理之學周易太極圖西銘近思錄未嘗釋手常瞑目端坐思索有得欣然見於顏面其學蓋已至於樂之之地矣言動舉止悉合規度可為人法辭受取予一決於義終

日衣冠危坐望之儼然可畏雖燕閒亦然居家孝弟忠  
信對妻子如嚴賓及至接人和氣可掬不語人以其所未  
至嘗以程門教人居敬窮理接引後學晚年造詣高明踐  
履篤實益至純熟其詩文平易冲澹渾成不假雕刻誠  
所謂布帛菽粟切於民生日用而不可缺者也讀者自  
當得之予早侍几席壯歷宦途老無所得追思誨諭不  
可及也先生歷官政績載在國史其風節道德自有天  
下後世公論在不敢私弘治己酉夏五月端陽門人關

西張鼎序

欽定四庫全書

敬軒文集卷一

賦

黃河賦

吾觀黃河之渾渾兮乃元氣之萃蒸  
濬洪源於西極兮注天脈於滄瀛  
貫后土之龐博兮杳玄溝之晶明  
過積石而左轉兮龍門呀而峻傾  
薄太華而東鶩兮撼砥柱

明 薛瑄 撰

之崢嶸入大陸而北徙兮迷不辨夫九河之故形經兩  
海而紀衆流兮擅浮沈之濯靈覽頽波而懷明德兮又  
何莫非如氏所經營登崑崙而俯視兮因彷彿其初迹  
馭高風而騁望兮遂周遊其曲直何末流之混濁兮始  
清澍而湜湜羗澹灑而徐趨兮勢沄沄而自得觸險石  
以鬪暴兮訛雷轟而轂擊天宇擴其沆漭兮渺上下之  
玄黃霧雨靈靈而滙集兮混邃古之洪荒微風蕩拂而  
渙散兮天機組織其文章頽焱浩而洶湧兮百怪垂涎

而簸揚腥雲濁浪以盪汨兮恍忽顛倒夫舟航靈曜升  
而赫照兮乘正色於中央望舒在御而下臨兮列宿涵  
泳其光芒若乃震秉符以行令兮百谷淫淫其凍釋山  
澤沮如以上氣兮增混瀆之洋溢魚龍乘濤以變化兮  
杳莫測其所極祝融載節以南屆兮雷雨奮達以滂沛  
潢支流而股合兮百川奔而來會木輪困而漂拔兮蔽  
雲日而淘汰狂瀾洶而嚙岸兮塊土焉塞夫衝潰霜戒  
嚴而木脫兮少昊執矩以司秋洲渚緬邈而石出兮始

殺湍而安流霰雪紛其四集兮顛頊乘坎以奮神大塊  
噫氣而摩軋兮流澌下而龍鱗層冰橫絕而山委兮河  
伯驅石以梁津羌險夷而明晦兮變朝暮與四時颺風  
起而衝木兮蟒怪駭其難推覩圓方之一氣兮恒來往  
而密移昔尼父之歎逝兮跨百世而罕知顧川流之有  
本兮與終古以為期啓龍圖而翫六一兮悟主宰之所  
為喟余心之未純兮感道妙之如斯聊誦言以自明兮  
庶晝夜之靡虧





皇而求索兮仰姬孔以撥板肇佳名以爰錫兮寓虛庵  
而頤顏闢混沌以為室兮鍵太素以為闕列冲澹而為  
榻兮鋪恬靜而為莞幕天宇之廓落兮鏡止水之澄灣  
延皓月以為友兮抱虛明之團團撫瑤琴而寫中素兮  
清風去而徐還步逍遙而徒倚兮悟達人之大觀飲太  
和而療渴兮味道腴以充餐佩文史之璜琚兮服禮義  
之衣冠不先物而內植兮恒洞達而平寬理無微而不  
蘊兮善無入而不安知靜存而動出兮合大化之循環

守此度之益敦兮諒感通之何難顧余質之中室兮慕  
夫人之閑閑願相從於廣宇兮長依倚而盤桓

雪賦

維月之孟陽兮氣栗烈而嚴凝歲忽忽而道盡兮閱升  
降之機局相重陰之蘊杳兮霏雪下而縱橫何玄冥之  
工巧兮鏤六出之竒形初揮霍而散漫兮遂漠漠而無  
窮乍大荒之微堊兮久川谷而俱盈灑長松之落落兮  
玉龍夭矯而騫騰逐回飈而入竹兮磕金石之琤琤被

嶽崙之絕巘兮若天兵起立而海波傾訝城闔之方啓  
兮敞馮夷之幽宮捲前簾而凝睇兮懸旒玉於簷楹九  
臯之鶴橫空而遠逝兮惟聞夫戛然之長鳴舞瑤臺之  
佚女兮迷不覩夫綽約之冶容疑地媪之効瑞兮珪璧  
磊落而晶瑩豈清都紫微之既春兮梨花飛絮而交零  
載瑤車而駕玉虬兮將遠觀夫九野與八紘遵渤澥而  
東鶩兮渺萬里之滄溟登九疑而瞰南極兮祝融不炳  
耀其銛鋒循流沙而涉弱水兮歷崢嶸之長冰臨大漠

而睨中土兮山川紆曲而齊同天地混融而為一兮又孰別夫濁與清乃旋轉而息駕兮獨愴怛於中庭四方上下皆在我闥兮擴靈府之宏澄探元化於終古兮聊向風而抽情亂曰洪鈞幹運一氣孔道兮四時相沓而翕闢何由兮陽以陰肅恩若仇兮閒寂無餘而發爛莫收兮蟲牟降伏三白肇休兮歲薦若茲我將何求兮

自修賦

皇降予以衆美兮實清明而粹全胡賦質之不猶兮乃

蔽昧而強辱自有識而發憤兮窺前修之閭闕誦古訓  
之數數兮服至理之拳拳雖苦心而極力兮猶未從容  
乎矩步忽內怛而自修兮吾知其故善既復而或失兮  
怠與敬其交驚心暫開而或蔽兮理與欲其紛互此實  
進退之機兮肇千里於跬步苟決擇之不勇兮將邪羸  
而正負蓋必於敬於理而保持兮於怠於欲其屏去既  
經心以自明兮復誦言以自固庶成性之存存兮全上  
天之所賦

思本賦

吾行年之匪少兮胡質質而靡思善惡原於杪忽兮寢  
千里其遠而木油油而上聳兮波沄沄而載馳託后土  
之鴻厖兮本大化之無涯肇總總之衆物兮咸資始於  
天淵矧含靈之物秀兮孰有不自其先先昭列而在上  
兮子孫繩其在下或一日而不思兮將原竭而本仆或  
廣植而不食其穫兮或勤施而不責所負渺河流之汪  
淫兮潤實漸於遐土啓我人以坦途兮闢我人以大戶

既登名於薦書兮復顯仕於朝列念積累之艱難兮恒  
拳拳而恐失服聖賢之明訓兮索衆妙於微蹟仰皇昊  
之賦畀兮保天理於晷刻謹余識之昭昭兮匪他岐之  
敢惑潔余身之皓皓兮豈外物之能涅是惟顧本源以  
自修兮若見親於羹牆行斯百而靡虧兮體毫髮而匪  
傷堅此志之罔替兮愛此言之不忘敦忠孝而日新兮  
庶末盛而流長

古詩



禱雨效韓體

盛夏將幾月亢旱何赫炎山澤不通氣水雷更深潛  
亦無所為徒聞掛銀蟾豐隆久喑默列缺寧窺覘螻蟻  
閉深穴老蛟遯幽潭凡此衆陰類畏避何安恬而獨哆  
口箕簸揚助飛廉微雲稍欲布驅逐無臺纖陰氣歛將  
合極力故攬捩蓬蓬太虛內日夕恣併兼既迎望舒轡  
復送羲和駢遂使平田中百物如燒燂吏民紛祈禱土  
梗空巍巖擊鼓神弗聞旱氣轉覺添焚巫果何計暴尪

信虛談我欲款上帝上訴其風讒狂吹既清息長舌亦  
收緘得使陰陽和坐見雨露霑枯槁總滋遂沛澤皆濡  
淹室家合飽足兒女無誦誦永荷神力慈式歌大化覃  
抱此雖自竒臨期復凝瞻

翫一齋為柳克新賦

靜觀一理大寥聞竟難言惟於流行際特達見本根胡  
為岐路雜靈妙日已昏玄聖發曾子濂溪啓程昆後哲  
總超悟殊途集同門吾友展禽裔古道性所敦乃作翫

一齋游處資操存極力屏羣欲篤志收竒勲歛茲義理  
微艾彼枝葉繁始知千萬緒無不會心源了此匪為易  
仰視有蒼玄

舞陽阻雨留宿

清曉發昆陽綠野散朝旭夾道禾黍長泥潦淹馬足東  
行得平岡舞陽忽在目入自西郭門兩街喜多竹爽氣  
拂征衣清風戛鳴玉便覺人境偏似有太古俗阻雨留  
憲臺倏忽經再宿永日覽圖書清宵散華燭念此居處

崇內顧王程速敢不勉忠勤而胡遂安欲比邑足名賢  
王常韓韶炳相續明發登前途回首憶高躅

宿信陽慈氏寺有懷趙侍御二首

禪室絕清灑夜景何寥寥白月墮簷隙涼飈拂林梢有  
客不能寐起坐心勞焦所懷同心友相去一何遙開門  
望天宇露冷河漢高恨無雙羽翰奮飛共遊遨秉燭遂  
至旦詩成還獨謠

山寺月皎皎流光入簾帷神清不成寐起視夜何其天

漢漸回轉參斗亦西移庭草泣繁露林竹生涼颼撫景  
念良友渺在天一涯會面曾幾日成此遠別離冉冉易  
寒暑悠悠隔山陂豈無他人好中情詎能知所願得懽  
晤以慰平生思

舟行野湖中

湖水與天平波濤亦何壯我舟駕長風遠破萬里浪玉  
節方在斯百怪誰敢傍明登岳陽樓八荒應在望

疊前

少小心好奇斯遊歲方壯雲帆拂遙天畫舫壓高浪青  
山歷歷過可見不可傍明泊洞庭湖還當極遐望

龍陽山行遇雨二首

楚山饒古木楚水遶竒石林霏暗不開石瀨瀉何急久  
行路欲迷嵐雨互蒸濕陟降童僕勞竟日未遑息向晚  
落葉多攬轡更駐立

歲晚山行深山中水重叠叢篁夾溪橋橋斷橫槎接陰  
雨竟連朝雲林黯一色虛風忽冷然蕭蕭墜黃葉撫景

復何為內顧遠遊客

宿山亭

山深郵舍孤入門晚色靜四顧足喬林蕭蕭北風勁向  
夕起重霏窻戶倏已暝燃松代秉燭明暗光靡定草草  
具杯酌何暇梨菓飭乃知山林趣足發遠遊興天明登  
前山清風滿蘿逕

瀟湘八景

余少時聞瀟湘八景之清致而未得一遊也今年

冬來湖南始得親歷而詳覽之遂為八詩以寫其

趣

山市晴嵐

雨來萬壑昏雨過千岫出晴旭楚人家蛾眉畫生綠看  
看如有情餘光遠相逐

洞庭秋月

西風淨晚烟天水遠相接瓊樓玉宇深炯炯涵虛白夜  
久風露寒一曲湘靈瑟



平沙落雁

霜清秋水落風過人跡平飛飛隨陽鳥相呼下寒汀向  
夕聚儔侶月映蘆花明

烟寺晚鐘

夕照下山門清音出烟霧暝壑一僧還側竹尋歸路月  
上楚天寬霜落洞庭樹

瀟湘夜雨

兩岸叢篁濕一夕波浪生孤燈蓬底宿江雨蓬背鳴南

來北往客同聽不同情

江村暮雪

落落漁樵家蒼蒼起烟霧岸滑移釣舟沙平失歸路似  
有凌波人盈盈月中去

漁村落照

釣艇收晚緜歸鴉集疎柳天風吹彩霞明月映江口孤  
村一笛橫萬慮復何有

遠浦帆歸

翩翩投極浦漠漠背殘照水柵歌竹枝清風激幽調歸  
舟漸覺稀錯莫尚凝眺

微恙不出

客居養微疴久與人事疎早起無所為盥櫛讀我書我  
書有真味寧比膏與腴膏腴常有厭真味諒難如自得  
復誰告撫心但躊躇

泊舟貽溪宿陽樓山下三首

泊舟清江許肩輿渡迴溪微逕入叢篠蒙籠行欲迷轉

步忽開曠溪田間高卑傍水野航小連林茅屋低適遂  
情景豁寧覺人俗非山堂稍曛黑冥冥子規啼

草堂傍溪谷瀟灑無塵埃隱几流水去開牖青山來客  
情既虛靜遠目何曠哉弭節得周覽外慮仍侵懷村落  
日已暝山岷猶未回念此不能寐遠抱殊難裁

窈窕入清溪側逕何紆曲魚梁截奔流雪瀨漱寒玉空  
翠濕人衣霧雨滿新竹路窮上野航前登得平陸日暮  
烟火迷似向桃源宿

舟中聞蟬

扁舟汎湘水水碧風日晴適有異鄉感忽聞衆蟬鳴淒  
切篁竹茂斷續楓林青家園舊喜聽客裏難為情時節  
知己易遠遊心緒驚因念衆兒女依依候門庭雖云憫  
中私尤當顧王程

湘江舟中

湛湛湘水綠夾岸叢篁多挽舟逆水上南風起微波嘉  
此晴霄景逍遙翫江沱沙渚曠緬邈雲岫紛嵯峩遠目

為舒暢客意將如何濯纓吾所愛聊為扣舷歌

至襄城

襄城古名邑山水殊清妍我遊適已再入境心欣然憲  
府絕瀟灑乃在城東偏停驂得所止景靜俗慮捐修竹  
滿堂後翠栢當庭前攀折將有贈聊比志節堅念之不  
能已長謠遂成篇

望諸葛草廬

我行迫王程訪古少暇日曉出南陽門馬渡消河急舉

目眺西岡林木半蒼碧有祠中巖我云是孔明室使我  
心慨然攬轡久瞻立憶當炎祚哀四海皆橫溢奸豪競  
虎吞孰知順與逆公時獨悠然放歌聊自適及來耕隆  
中日以老所益高視千古人管樂自儔匹有時發中懷  
長嘯獨抱膝寧知卧龍姿還為冰鑑識賢哉劉豫州三  
顧何汲汲問以當世事指掌皆歷歷自茲出茅廬魚水  
情尤密後來大業興益見前籌力公心果何如是欲靖  
羣賊復漢還舊都志願乃終畢奈何逢厄運終匪智能

及五夜星隕營三軍淚沾臆至今五大原悲風尚蕭瑟  
遂使英雄士遺恨無終極今來望公廬咫尺不暫即園  
井定依然遺像想猶昔平林渺寒烟長鬢帶古色所貴  
賢者居孰不仰遺迹鞭馬復南行迴想猶未釋朗誦出  
師表沈思八陣石浩浩天壤間奇才難再得他年擬重  
來更當展良覲

襄陽道中

曉醉新野縣午入襄陽境迢遞岡坂長曲折溪流靜入



村竹青青便覺異風景惟時霜雪繁歲晏北風冷中私  
且撥捐壯觀極馳騁日暮臨漢江窮源思方永扁舟過  
須臾波濤任奔猛遠行足險夷吾心良獨省

登峴山

停舟漢水濱跨馬陟峴首漢北渺川原漢南足林藪山  
水兩迴環地氣蓄不走城北一掌中名勝良不偶紅樓  
香難即粉堞粲可取虛白瞰遠沙踈翠俯高柳柳外居  
人家向背各開牖美哉風景奇詩興濃於酒下馬復山

行遺壘高培樓歲久悉荒殘戰骨亦枯朽緬思前代爭  
南北此樞紐典午窺併吞元宋竭攻守兵連歷歲時良  
田生宿莽力屈或不支乃為強者有而雖富土疆竟莫  
絕稂莠明運開萬方稽顙惟恐後浩浩江漢間一洗舊  
昏垢詩傳二南俗人享百年壽乃知皇力尊澤及生靈  
厚小臣職觀風登覽匪外誘所願歌昇平彌億萬年久

岷山羊公祠

岷首羊公祠周圍帶草莽重是古名卿舍舟聊一上雪

消江路滑氣暖神扉敞捫碑澁蘚痕褰帷綴蛛網字隱  
不可讀風流猶在想想當公昔年跨馬此登賞顧彼山  
常存身滅足悵快寧知千載餘公名蔽天壤遂使山增  
輝過者悉瞻仰足明仁厚澤不與時世往我來復何為  
作詩踵遺響

遊習家池

谷口一逕入蒼山四邊開中有習池水水碧無纖埃泉  
源初噴薄交流遂滌洄飛鳥鏡中度行雲天外來微風

金定四庫全書  
卷一  
一蕩拂林影久徘徊寒光空心性俯翫何悠哉愛此不能去載歌寫中懷

遊君山寺

為愛湖中山遂尋山下路躋攀轉幽邃澗谷亦回互石  
蹬足莓苔青林雜烟霧前林如有窮嵐嶺乍分布招提  
壓重湖千里周一顧孤峯四無根形氣自依附山僧復  
導我窈窕更徐步踈籬野蔓懸老圃寒泉注徑轉山房  
深重與絕境遇白雲簷外生清風竹間度庭花雜無名

歲晏色猶故澄心得妙觀忘言契良晤愛此林壑清遂  
薄塵俗務重來待何時尚子畢嫁娶

洞庭過雨

孤舟行何遲歲晚洞庭雨跳波亂明珠隨風颺細縷雲  
霧失君山波浪連吳楚莫唱斑竹枝別思滿南浦

青草湖即事

洞庭方始過青草又相續水落湖地寬冬暖草芽綠遊  
目解孤悶即事忘拘束艤棹觀魚罾援弓射鴻鵠取笑

復何為聊爾徇人俗

雨後臨雙池

時雨夜來歇雙沼朝欲平  
香草何瑣雜芊蔚繞岸生  
修竹瀉風露圓荷貼青萍  
顧此好修客覽彼衆物榮  
徘徊撫雕檻徙倚當素屏  
採掇終有贈緬焉起深誠

雜詠六首

巖巖泰山石靄靄石上雲  
須臾遍八極霖雨竟朝暉  
功成不言利收斂不盈分  
致此豈云遠舉目窺嶙峋

溶溶綠池水上有嘉樹林白鳥來何方集此清池潄毛  
羽粲霜雪和鳴激流音可見不可即徒勞觀者心一舉  
沖青天虞羅諒難尋

江漢豈云廣一葦可以航山岳豈云大吾將陟周行淇  
水有棗竹澧浦多蘭芳既自抱孤節還應發幽香合并  
會有時遠抱非俗量

皇天無私厚一雨萬物滋朝樹泣膏沐庶草紛淒其青  
陽舒景曜谷風扇和熙遠遊涉獻歲寧不感良時

惟山有奇石惟水有連漪吾心諒誰告耿耿徒自知悠  
悠世間物邂逅貴有時後來安劉者往日吹簫兒向非  
附青雲汨沒將何為蒼蒼霜雪幹豈無大廈姿山深少  
蹊逕匠石慎所遺

古劍匪新器古瑟匪新音雖無適俗態知己在所尋充  
子佩服美感子淡泊心韞匱固有待無悶良可欽

新筍

方池錦萍滿花草被四阿生意一何盛新筍池上多綠



苔已穿透粉籜方包羅銳若毛遂穎森如羽林戈朝翫  
夕已高舊竹時復過相期保堅節歲寒心靡他

會同院中

會同古蠻服市邑何蕭條霜臺絕清僻道院無俗囂芳  
草滋新茸高柳垂長條石砌滿苔色可以慰逍遙行翳  
涼景肅顧望白雲迨塵羈豈能絀何用山林招

淑浦雜詠三首

山縣孟冬交草木盡黃落官署何嚴嚴寒雨灑寥廓讀

金史卷之九十三  
卷一  
書三十年志願常異豁栢府既先登憲節復早握蠻荒  
過三秋征科愧才弱所願採蘭芷聊以比葵藿深念方  
在茲無欲自欣樂

辰沅異風土十月足靈雨竟日復通宵清響徹烏府久  
客厭聞之晏坐默不語經世志未酬讀書心獨苦往事  
感中懷良辰復誰許悠悠付深期取適自容與

淑浦絕小邑昔無名士遊我何秉憲節來此乃淹留庭  
前高木落屋背荒山秋公廳靜苔色風雨寒颼颼離別

感時節得無念中州深哀如可致過是非所求

山館

稅駕日亭午愛此山館清藩籬翳嘉木但聞幽鳥鳴開  
門遠翠來白雲望中生便覺臞者肥似有戰勝情野蔬  
足充餐作詩紀茲行

渡雙溪

雙溪始合流崖渚遂經復洄潭一鏡平秋影空寒綠野  
渡得孤航山家帶喬木適意方自茲前呵戒僮僕撫景

重悠然誰能和斯曲

沅州元夜

五溪古荒服連延列邊墉自從啓明運便已變華風  
民俗競佳節適與中州同我來一何久三見春燈紅竊食  
飽官廩曾無分寸功豈不愧伐檀還應感飛蓬今夕復  
何夕列炬當庭中行翳修竹枝吟對梅花叢翫此歲寒  
物舒我天游蹤言歸即當歸掛席湖江東

贈趙彬

黔中山水竒產物亦秀異丹砂色光炯黃金質精粹碧  
春石汰淘永煉土騰萃其他榎楠樟挺特皆偉器因念  
上天公造物無私智不應山水靈而獨鍾斯類竭來客  
沅州果愜向所意趙子生其間不與凡猥廁神完骨亦  
清最得二五秘卓從少小日即負遠大志蠻荒乏師友  
買書自從事子集聖賢文左右悉堆置抽覽無停晷一  
一欲強記晝誦聲聒鄰夜諷響穿市寒暑忘冷熱飢渴  
失滋味停蓄才思深馳騁筆鋒利出語動驚人縉紳悉

推避勤苦凡幾年銳氣久仍肆邇來加斂收精識亦超  
詣雅欲求本根不獨誇文字我昔從先人壯遊滿天地  
邂逅多賢豪殊趨各同志談論隨有得皆足飭昧稚自  
忝臺閣官遂攬湖襄轡方懼過不聞深恐德將墜忽於  
僻遠中得子喜不寐我愚藉子砭我失任子刺所以愛  
子心誠實不虛偽觀彼物怪瑰時尚亟搜致况賢治之  
積尤為國上瑞四門方洞開四目方遠視明堂要梁棟  
法駕用騏驎子當寧厥需會起靡天翅

題太極圖

大小圈十箇都在一圈上如是究竟言一圈也無象

古詩十二首

爰初闢清濁悠悠千萬年三墳既已失古道茫昧然神  
聖既有作人文漸開宣義軒御元極堯虞運中天粲粲  
河洛秘密密精一傳太和良自茲玄功竟難言萬理如  
何即寤歎窺遺編

窈然觀化始本自同一初聖者惟其性大道蟠皇輿云

何千古後岐路如錙銖西學外形器玄宗暢清虛滔天  
勢方漲捧土誠為愚不有諸老力生民竟為魚寄語後  
來人慎莫迷所趨

行鴻暢遠澤鳴條沛時雨白旄一以麾九鼎奠中土三  
后同一功休明諒難伍云何王風頽故宫滿禾黍大雅  
遂寥寥遺音獨淒楚悠悠哉復悠悠哉白雲在高阜

水火非無功焦溺亦由此所以玄天機千載莫能理君  
子得其操小人迷所止四海豈不遙發軔良自邇泰山



豈不高舉足不踰咫薰風愜民心簧竹蕩人耳善惡反  
手間胡不慎其始

七百卜公旦萬世期咸羸豈不同所願天道有虧盈岐  
山麟鳳集函谷虎豹爭趨舍乃如此大運焉得并蓬萊  
舟始泛博浪車已驚遂使三秦士不獨驪山坑已矣勿  
復言九宇皆炎精

靄靄商山雲招之正徘徊冥鴻一以縱畢弋胡為哉寧  
知羸豕壯躑躅多毒猜沈沈辟穀子為謀一何乖向非

平勃力炎靈遂如灰獨有周南篇歌之有好懷

山空颯颯出天黑鴟鳥鳴姬轍既東邁岐路殊縱橫青  
牛適西域大鵬抵南溟談天竟何益刺股徒首兵紛紛  
險譎輩瑣瑣難具名有若迷方客甘心棘與荆不有仁  
義篇何由覩天明

吾意六籍外尚多古人書一朝秦焰裂焚蕩無遺餘掇  
拾煨燼者補綴誠區區訛缺固已多盡信寧非愚獨有  
羣聖心昭哉難翳如多謝宋諸老萬世開迷途

季子多黃金張儀富秦土腐鼠爭飢鳶鹿豕競貪虎周  
道久已非王網如綴縷巖巖養氣翁鳴鳳獨高舉圓方  
遍九州周覽無定所天飈激和音雲漢濯文羽大道今  
依然捍闔安足數

日月自有明陰陽自有行萬物紛變化人事更衰榮云  
胡道術裂瞑目談丹經泛海竟茫然樓居亦虛名自古  
良若茲擾擾將何營

聖人無曲行大道無邪岐云何周轍東驅車迷所馳楊

朱學仁義莊老尚無為申韓首法備蘇張倡危機遂令  
千載下道術日以支憔悴莫之悅淳朴諒難追此語匪  
為誑書上有其辭

易莫易玄穹簡莫簡坤土聖心本虛明條達無曲阻如  
何末學差崎嶇躓榛莽二者祛除之明白可深覩多謝  
古老心相將踐斯語

秋日雜詠四首

庭樹生秋風微涼入衾枕久客得無思遠意復誰論道

腴足充餐天和可當飲以茲撥離憂僻好安所稟大義  
自古來旋履吾已審

翻翻高荷葉秋雨生微涼豈不懷遠道撫時坐空堂何  
以為我懽簡冊多遺芳古人不可作古道不可忘茲理  
將無厭欲語墮渺茫安得忘言子相與傾一觴

亭亭紫玉竹爾節豈不堅託根自有地勿羞桃李顏桃  
李固妍好爾節重自保請看君子心浮雲湛秋昊

粲粲黃金花繞砌顏色好豈不重所思焉得致遠道遠

道不可忘感時歷炎涼人心豈此異保爾秋節香

述懷

少小習書史政自賴先德十五慈見背四十嚴永訣追  
思鞠育恩俛仰肝腸熱中心恒拳拳每懼有遺失早忝  
科第登中厠縉紳列榮耀既連綿聲名頗烜赫小子心  
不然自顧真有缺國恩未酬報孝祀久虧越祇命湖湘  
間久載憲府筆一往三年餘及歸有華髮家室寄中原  
無產給衣食大兒亟假田農作不遺力次男失學慣游

情無儔匹三子雖孱懦芻牧無休息昌子最痴小奔走  
百不識寒即索母衣飢則索母食老妻亦何為頻年苦  
煎迫上以奉繼姑下以撫兒婢執爨色焦槁補綴眼昏  
澁我雖官在朝蓬梗真浪迹及歸苦告訴數子俱未室  
生理况蕭條儵寓亦何益我復對三歎此乃共所恤顧  
我有王程尚敢懷私適勉強數日留慷慨一旦出悠悠  
離蓬茅行行向金闕路從黃河過舟自衛水發舟中忽  
有懷所懷何歷歷吾聞古人言老窮當固節况我筋力

強所願豈契濶誓將篤忠貞于以守清白上隆唐虞治  
下布雨露澤祖禰如有神光賁亦行及拜恩省先塋勒  
石紀世烈栽桑汾水南廣土中條北既足紆困頓還可  
樹遠業男女各婚嫁親戚共周急此事良可期援筆聊  
自釋

臺中歸

習僻已成性於人懶將迎日暮臺中歸掩戶親一燈但  
取書笑樂不顧俗重輕自得復誰語茲道將吾成



一室

奉使三年歸京華營一室一室陋且偏入門惟四壁豈  
不憂窶貧所貴稱達人無倉廩儲心有宇宙春蛸蚋  
復蝨蠹顛冥不知返周道能摧輪不在羊腸坂惟河有  
天源惟山有崑崙擾擾勿重陳宴坐思探元

題思顏卷

零零雨露滋肅肅霜氣寒時物代榮悴君子感所觀所  
觀一何苦時運靡終古俛仰天地寬思父復思母夢寐

如見之温温金玉姿行坐或可覩冉冉霜雪絲春風若  
在室機杼倚虛壁咳唾落珠璣琴瑟當窻急顛倒將無  
厭而不間毫纖幽感鬼神泣明被日月霑所以永言者  
誠孝不容假勗子勤蓼莪短章代風雅

古詩二首

驪珠出九淵炫晃稀世寶緘藏俟良價賞識待終老云  
胡知者稀衆道魚目好君子復何憂温明但自保

津人善操舟慣捷輕洪淵來濟者誰子濡溺幾不全顛

倒受唾薄中懷詎能宣請陳經濟畧視彼蠅螿然

夜坐二首

銀燭一寸光照我千古心心事諒誰語秉筆空沈吟幽  
懷載草草妙思彌惛惛豈無揚子雲視昔猶視今

滄海豈不大井蛙良自餘至言豈不美俗士恒苦拘賢  
哉顏氏子妙領非真愚若人不可即郢質將焉如

讀陶詩

靖節一何高理鑿時運表返耕甘苦饑棄世樂枯槁所

以見諸詩淡泊出天造掩卷思其人清風起林杪

示兒

我祖自奚仲奕代河東居家本尚儒素業豈羞寒虛先  
君紹前烈奮迹由詩書勤勤教諸子為善樂有餘藐孤  
欽誨言而敢忘斯須憶從向學日爰自北角初吟哦竟  
朝昏誦習忘飢飭收斂心自得放佚已不趨周旋恐失  
墜日奉庭闈娛立年忝科名嚴訓尤渠渠進學固無怠  
即任其慎諸承懽曾幾何風木俄悲吁追慕復何及首

疾心更瘡中間趨明詔皇渥彌寰區祿有不家食官有  
臺閣居循才覺孱弱索報知茂如以茲寵若驚自治如  
苗畬更念汝四子賦質各有殊當思祖澤長勿貽汝父  
虞汝父豈可師不有賢聖歟孝友亟敦勵心性勿填淤  
匪善人莫交匪義財莫需止酒戒狂誕窒慾謹湛孺從  
慾劇墜石放言甚奔車言多必招戾惡積終隕軀人生  
有定分造化司柄樞窮達由天然富貴非人且歛跡甚  
勿競閑戶宜自慮但使德學充不愧金壁儲達即思致

澤樂即思賢儒小子敬所植永久期無逾

新燕

高堂新燕子當晝語喧聒雙雙葺舊巢銜泥自寥廓巢  
成去還來莫負明年約

楚楚者誰子

楚楚者誰子意氣何軼人居若無儔匹獨步莫敢親姬  
公雖大聖尤尚吐握勤此道久已非擾擾勿重陳

翩翩誰氏子

翩翩誰氏子鞍馬殊輝光入門佚興發促步登高堂妖  
姬列左右哀彈送清觴酩酊百不憂但願白日長

答趙彬十首

余知趙君將十年矣近又會於京師惜乎余力不  
能振之也雖然君子求其在我者而已用舍遲速  
非所汲汲况如君者又當待振與否能為之輕重  
者哉余近有山東之行君以十詩見貺反覆誦玩  
益知其所存之不苟但稱許區區者有所愧耳情

不能已輒依來章以答其意云

美人生南國艷色世所稀  
明眸一回顧草木生光輝  
我行重嗟惜便欲携同歸  
贈以青玉案貢之黃金扉  
如何久契濶此念將無違

右答龔北生騏驎

仙山有高梧玄圃足修竹  
飄然九苞鳳下覽遂所欲  
流音散天飈文彩絢朝旭  
泰和良在茲瑞牒光前錄

右答青青嶺上松



層雲生岱宗時雨遍東海杏壇宛如昨聖人教猶在况  
當時運熙文風盛而藹翹翹士林英無不生光彩我行  
亦有為棫樸詩當采

右答屈軼生堯庭

我我憲府臺鬱鬱臺中栢顧我樗散姿繆作乘驄客悠  
悠今幾年區區竟何益寧知憂窶貧但自保貞白中復  
荷寵光分符海東域得觀鄒魯風載霑詩禮澤皇仁一  
以敷菁莪共欣悅猶有江湖心時將應天闕

右答泰山何巖巖

馳車出都門  
遥遥指齊魯  
念子不能別  
對景獨容與  
垂楊裊薰風  
輕塵裊朝雨  
仰視雲間翼  
分飛無定所  
丈夫方有為  
離憂寧足苦  
願保金玉躬  
潛修繼前古

右答扶桑日初出

鷓鴣在一枝  
鯨鵬起千里  
達人足大觀  
曲士焉足擬  
所以君子言  
觀海難為水  
大哉天地間  
舉目皆至理  
努力探化元  
高歌望吾子

右答丹砂生楚國

天運行不息君子恒法之乾乾不自已汲汲非所私仁  
義存諸身有蓄必有施既非淺俗觀當負遠大期吾子  
安厥需彙進寧非宜

右答日月易流邁

丹山有文羽和鳴向青霄滄溟有潛鱗一夕搏扶搖如  
何賢達士甘心向漁樵諒懷肥遯志恐負山林朝休明  
盛夔契于焉共逍遙


右答珊瑚生海底

吾觀天地大萬物同一源如何末學差坐此枝葉繁鉛  
華滅素質雕蟲失本根憶昔南遊日得子同晤言圖畫  
發幽秘身心契真元邈哉追前修此道期共敦

右答天道久不講

古來賢哲士用舍皆無心所以窮達間一節良可欽趙  
子不浪出客居時光臨矢心永無斃感子金玉音

右答古人重見處



敬軒文集卷一

欽定四庫全書

集部

敬軒文集卷二

詳校官編修臣翟槐

中書臣劉源溥覆勘

總校官庶吉士臣何思鈞

校對官中書臣李斯咏

謄錄監生臣姜士安

欽定四庫全書

敬軒文集卷二

古詩

穆陵關夜雨

暝色來遠谷清風動華燭山樓雨聲寒羅帷人獨宿

山行

山鳥多清音山花有異香但得山間趣寧辭山路長

明薛瑄撰



又

荒岡斷復連風葉散還集霜落秋澗清烟橫晚岫碧

作息吟

向晚羣動息向曉羣動作羣動作息間乃是先天學

東平行臺有竹翳於惡木荒草命僕芟治嘉植

乃遂詩以紀之

生平苦愛竹義若君子交茲軒忽見之俄頃漆在膠振  
衣步其下周覽增鬱陶惡木一何多蔓草一何饒翳此

破苔筍撓彼凌雲梢命僕恣剪伐得辭斤斧勞除惡貴  
絕本蘊崇及溝壕荒穢既了了涼風亦蕭蕭修莖遂生  
植嘉蔭愜遊遨作詩紀顛末庶為同心謠

穆陵關

危哉穆陵關高出衆山頂地勢愈覺寬天宇相迴迥林  
木何蕭森首夏風色冷山樓試一登眺覽恣遐騁沂岱  
環西陰淮海接南嶺齊州走北川扶桑控東影道里會  
一門山川挈要領緬思千古前豪伯互吞并齊履空復

然秦蠶已侵境干戈被長鬻生民困魚鼎于今天道旋  
四裔守安靜山行晝落然水宿夜無警顧我觀風人符  
節得屢秉作詩紀茲行傳與山將永

蘭陵懷古

早發郊子國午至蘭陵邑蘭陵久已荒禾黍帶荆棘惟  
有古寺存逕入林影密老僧知我來出門遠候立下馬  
問往事為我指遺跡蒼茫古城東墓有荀卿石我欲往  
尋之還為野水隔憶昔周室卑蠻荆凌上國茲邑乃其

疆人物殊烜赫寂寞千載餘浮雲空古色如何當日賢  
重有逃讒責只今文字存尚為人指摘鞭馬舍之去極  
目遠天碧

敬吟

人惟肖天地亦具天地性性無物不存存性惟一敬心  
敬體不偏情敬發必中頭敬形端直鼻敬氣肅靜目敬  
無邪視耳敬無妄聽口敬不妄言身敬不妄動手敬容  
必恭足敬容必重瞬息敬存身早作敬致用致用在天

倫天倫敬斯定夫敬必先義婦敬必從令子敬孝必隆  
父敬恩必盛臣敬百職修君敬萬邦靖兄敬篤其愛弟  
敬謹其行朋友以敬交然諾必重應敬則倫理明不敬  
百行病仰惟古聖人一敬更相命堯欽帝之宗舜恭明  
兩並祇台念禹德日躋有湯聖文王安敬止武王勉敬  
勝篤敬傳孔業敬德著周政敬惟羣聖樞大訓迭輝暎  
下逮河洛儒紹統開迷逕整肅嚴隄防主一謹操柄惺  
惺不昏昧收斂無餘剝用力在斯須百體孰敢橫聖途

漸可登聖言良可證一敬苟不存萬欲皆奔縱身心墜  
卑污網常滅天正禽獸將同歸人類孰與共噫嘻敬息  
間狂聖越天阱法言述聖謨匪曰小子佞

送楊參議三首

白露下將夕天宇生涼風之子有所適告別何匆匆羣  
公盡祖送飛蓋凌長空停驂灤水曲列宴歷亭中秋容  
澹觴酌高風急絲桐酒盡儼將發斑馬何玲瓏行當釋  
塵鞅還應掛飛蓬大江轉吳楚重山入天叢錦城有佳

色浣溪有遺蹤訪古遂舒嘯觀風足從容坐令全蜀俗  
鮮與鄒魯同茲遊豈云易兩情若為通翹首遲歸鴈應  
是春花紅

右分韻得紅字

林木生涼颼臯蘭被清露念子三川行正值九秋暮天  
空一鴈翔江遠孤舟驚旬宣有佳興載詠甘棠句

右分韻得露字

岷江瀉東溟岷山倚西極江山古名秀楊君將此適秋

風送征帆夜火明  
水驛相憶瑤華音  
看取東飛翼

右分韻得驛字

友鶴軒

九皋阻且深  
潔白有佳鳥  
中宵忽長鳴  
清響徹四表  
開軒一聽之  
衆理悉明了  
蚌蛤藏洪淵  
秀氣浮浩漭  
良璞在崑岡  
清輝散巖嶮  
雅興與茲同  
至德潛且皎  
溫溫聖者孫  
大道思遠紹  
友鶴名華軒  
存誠絕外擾  
水積成川流水壅  
盛顛杪功深効  
豈徹響大聲  
不小慙非風  
雅才



作詩心自慄

冬夜懷魏希文

希文名純山東萊州府高密人時謫戍玉田

冬夜氣何厲冰雪輝前楹單居不能寐懷我舊友生行  
雲去不息賓鴻各時征兩情曠難合欲語誰當聽惟有  
寒月光見予心宇清展轉遂至旦遠思徒營營

余既作此詩至來年三月間有黨厚本者關中士人  
也先任教職又為縣令後謫戎伍間復膺薦授荆門  
州幕職道過蒙邑黨先與余有故因復問之始知吾

友希文亦以薦至京師未及試用而死矣及考其死  
之冬適余作詩時也嗚呼希文純古君子將謂其不  
終老於草萊也而乃竟止於斯豈非命歟且余作詩  
時適與其卒時又相先後亦豈非平昔交遊之深默  
有所感歟嗚呼已矣時宣德二年春三月河東薛瑄  
識

荅仰宗岱寺丞見貽韻

念子青雲器早涉青雲路行行捧德音  
睠言省民務風

俗廣咨詢幽隱亟告訴來為人所悅去為人所慕皇澤  
一以敷郡國足膏澍况復崇文儒士林喜披霧心涵玉  
壺冰氣裊金莖露懷哉明盛時展矣風雲遇而我同官  
良惟子荷與顧通籍來旬宣各自植嘉譽獨有蘭臭言  
祇以同心故還應篤忠良更此寫中素何當展良覲相  
期在秋暮

題陳希夷圖

三峰亦何峻白雲亦何多中有高世士冥栖掩松蘿石

泉漱寒玉好鳥間青歌歌長一披拂紅紫爭紛羅山隔  
五季塵年顏萬里波豈無經濟策肥遯矢靡他威鳳不  
浪集冥鴻難重過清心探化機瞑目養天和真息深在  
踵利貞靜不訛只疑龍蛇螫不管歲月梭我欲昇玉井  
濯手攀嵯峨扣關起公語妙理應如何欲去還自休馬  
圖今在河

永慕堂為楊大參賦

大化運不息逝水無停時依依舊居室惻愴中腸悲書

殘讀遺編機有餘  
斷絲斑衣不再舞  
壽觴寧重持庭前  
百卉芳但覺陰陽移  
儀容切寤寐恍惚如見之  
親心我所安親志我所期  
心志著且存大節矢靡虧  
悠哉孝子情勛此終天思

遊禹門

禹廟在焉

春澤周四野閒情樂時和  
出郊縱逸興緬懷佳山河  
禹門忽在望峭壁雲嵯峨  
石磴接飛棧危樓架洪波  
空山響絲竹虛堂進舞歌  
父老誠苦心旨酒神所呵  
由來非

一朝吾意其如何

河汾五賢詠五首

卜子夏

浩浩西河流遙遙東魯山山河遠相隔千里獨遊還升  
堂奧可入豈曰文辭觀相從陳蔡厄松栢知天寒索居  
晚歸來侯國師甘盤去之幾千載高風灑塵寰瞻望不  
可及青雲映西關

段干木

冥鴻不受弋神龍不可羈所以高世士孤情薄雲霓矯  
矯段干木志節一何竒珪組豈其願軒冕不吾希踰垣  
猶弗見况乃趨走之豈徒侯國尊凜為百世師

文中子

古人不可見古俗寧復淳依依萬春鄉踈屬連清汾良  
時曠莫與鳴鳥寂不聞悠悠禮樂志終與麋鹿羣頽波  
逝東極寒雲滿西津惜哉經世言清雜多蕪榛時無伊  
川子此意將誰論

太史公

愛有所見忘忠有所見疑古來非一朝人道每如茲悠  
悠太史公言論適有期謂必情可白寧知事參差奇文  
雖自解驟驥諒難追巷伯彼何人千載存其詩

東臯子

人仕為其名子仕獨為酒一斗衆所稱五斗吾自取猶  
嫌酒未足棄官歸隴畝葛巾耕東臯烟雨牛一耦種黍  
學陶翁自釀還給口沈飲得真味萬事亦何有清風千



載餘誰復尚能友

古詩

天地常不沒山河鎮如斯惟有人與物代謝無停時因  
過咸秦境周覽生悲思渭水自縈帶南山亦參差茲惟  
帝王宅自古稱雄奇當時宮闕壯摩霄切雲霓千門與  
萬戶珠簾錦繡帷一朝時事去掃地無復遺城市盡為  
墟麥秀草離離亦有英雄輩干戈互相持慷慨爭土疆  
終老志不衰只今但丘塚名姓寧可知京都足妖冶高

門富姜姬綽約姑射仙鬢髮冰雪肌只今化為土况乃  
粉黛施休明盛文物旗常畫蛇龜千乘及萬騎雜還相  
追隨將相立軒冕聲樂奏英池繁華有萬端一去不可  
追俯仰千古事有若夢幻為往者既已然將來復如之  
寄語執迷子當以理自推

浩歎

浩歎復浩歎寧知親眼見相彼天雨雪必有先集霰蟻  
穴不知防鯨波今汗漫君子慮兢危小人尚欺誕已矣

無與言歸去耕吾畔

瀘川古意

三蜀古名郡瀘川古名州  
我來值殘暑偶此數日留  
新秋忽改節涼風漸颼颼  
逍遙散前除仰視天宇周  
征鳥去不息白雲亦悠悠  
佳人渺何許重林蔽層丘  
秋日復西邁大江自東流  
良辰不我與古道曠莫酬  
願聞瑤華音行矣旋吾輶

五盤山

五盤何艱哉石磴繞山腹詰屈入雲霞回互下崖谷嗟  
彼遠道人陟降勞筋骨跋馬登層巔悠然注遠目惟見  
山色高似覺地勢促蜀道古艱險茲險甲西蜀憶我去  
春來山山正芬馥今夏喜北歸四月暑未燠茲山得再  
過頗快登覽欲前驛望黃壩蒼蒼但雲木

登金牛驛樓

好山四籠窈漢水前縈繞小樓試一登山水青未了因  
思大禹時洪流方浩渺乃竭胼胝勞神功彌八表岷山

在經紀岷江亦䟽導貢賦分九州梁州已通道世傳金  
牛誕曾不細搜討山驛賦短章將為愚者曉

七盤道中

曉度七盤山北行道彌惡峭壁根虛無危棧架飛閣飄  
飄風吹衣漠漠雲漲壑下有黑龍江亂石何磊落急瀨  
轉雷轂奔湍散流沫洄潭更陰沉俯視誠可愕茲路屬  
再來即事情已昨艱險難具論惟與存顛末

褒斜道中

褒斜一何長深谷自迤邐雲木青無邊羣峯各峻峙鳥  
道緣崖巔危棧架江涘冥冥叫子規泱泱響溪水累日  
山峽中陟降亦勞只古來蜀道難此道難莫擬自我入  
蜀門今已一年矣既乏督辦能兼負素餐恥而况鬢髮  
蒼胡寧不知止上章乞解綬詔許感不已雖云此谷險  
且遂北歸喜行色宣柔毫庶用傳孫子

遠道

遠道復遠道驅馳何草草及歸已踰年白髮添不少入

門悼先亡痛哭傷懷抱子婦共號咷百感相煎燭拭淚  
問里閭嘆逝驚莫保衰殺誰使然矯首問蒼昊從此甘  
息機田野安吾老

孟城驛雪中詠竹

高沙有候館闌檻殊幽清檻內足凡木凋萎不可名獨  
彼凌雲竹鬱有冒雪青飄蕭散寒葉修直搖蒼莖靈籟  
奏清響鏘若金石鳴晴霄吐華月流影亂虛明賞翫竟  
朝夕似當西南朋乃知歲寒操匪獨松柏貞天心又不

如愧我為物靈

徐州洪

亂石何巉巖長堤更宛轉  
狹岸忽陡起急瀨如注坂  
回旋聚流沫駭浪灑雪霰  
舟行良已難下上勞拽挽  
翻思遊川峽江石尤險遠  
瞿塘十二灘波浪激雷電  
迴視過茲洪反若歷平坦  
乃知所觀大小者不掛眼

淮南謳

淮土何漫漫淮水自悠悠  
小山去已久桂樹遺巖幽  
昔



有學仙子意欲仍丹丘  
秋石既烹煉鴻寶亦藏收  
鷄犬竟莫聞行雲去難留  
寧慮時事異翻結千古愁  
舞榭荆棘生歌臺麋鹿遊  
信知希世事伊豈望外求  
揖讓有堯舜高風想巢由  
此道久已非聽我淮南謳

高郵冰泮發舟

晚泊高郵城雨雪竟連日  
念彼役人勞寓此孟城驛  
扁舟候晴發河冰復鱗積  
因之累宿留令我心悵悵  
忽報寒沍解喜泛春流碧  
直過大江東此地成追憶

冰解舟發

春冰渙然釋春流復溶溶解纜孟城驛百尺牽東風連  
翩大舸來我我掛飛蓬登艫恣春覽烟華正濛濛澤國  
曠無際重湖渺難窮漸覺高郵北行及廣陵東所過足  
清眺舟人莫怱怱

出自城北門

出自城北門周覽快心目我我鍾阜青漫漫平湖綠木  
依長堤茂樹隱芳洲曲縹緲天際樓高下林間屋遥遥

江上山連連遠岫出江山自雄竒帝里在經復佳麗從  
古然嘉氣方葱鬱官署何巖巖列宇面山麓偶茲吏隱  
兼頗遂蕭散欲超哉復超哉白雲自相逐

晚翠亭為張司徒作

花木何紛然各競芳菲時一夕下霜霰憔悴無故姿巖  
巖司徒府後圃殊邈迤而於歲寒日挺此萬竹枝羣芳  
盡搖落茲物獨見竒密葉既不凋勁節亦不移一逕入  
深處橫橋夾清池池亭晝虛敞宴坐生寒颼清影落四

簷靜與秀色宜適  
契君子節貞固老不衰  
為取亭中琴絃我晚翠詩

澹菴卷為謝侍郎乃兄題

閩山何處堯閩水亦清泚  
中有肥遁人雅志丘壑美山  
田入雲耕結屋傍流水  
耕稼有餘閒琴書時復理  
寄興槁梧中游心竹素裏  
庭戶無鷺塵外物絕珍綺  
疏食足充餐絺布良適體  
朋來無雜言談道而已矣  
至樂既無假浮榮焉足擬  
所以忘歲年足不至州里  
白雲在高丘

鳴鶴在中止安得躡輕風一訪澹菴子

擬古四十一首

天地形之大陰陽氣之尊伊誰知此物來自無極門清  
濁既莫離動靜互為根大化去不息至理亦長存彼哉  
虛寂子已矣無復論

悠悠復悠悠水中有行舟四序無淹歇代謝不可留春  
鳥寂無聲寒蟬號素秋落葉滿阡陌白雲散巖幽去去  
莫復道潁陽有遺老

庭前桂花發清香散涼颼采采黃金英傾筐方自持思  
欲贈遠人風波阻長岐望望不可反馨潔空自竒

吾思古聖心迥出八紘表天理為之大人世為之小堯  
虞禹相授杯水拱揖了終古駭其事未足稱達道

四時一何神變化不可測陰陽既交代星辰遞羅列孰  
其主宰之終古不差忒聖人秉明靈動息有貞則吾慕  
魯中叟矢心以學易

端居憶遠遊路經首陽山山有二賢祠青松蔭重關斯

人難再得守餓心獨安清風激頽俗高義越人寰去之  
幾千載可慕不可攀

騶虞獸之瑞麒麟獸之仁物性尚不殺而况形為人夫  
何周轍東王道久已湮孫吳騁狙詐申商號無恩流毒  
劇洪水遺黎苦漂淪強羸滅諸國三戶亡咸秦天道信  
反覆永為來世陳

聖治莫九有禹跡亦茫茫王澤既饒洽彝倫復昭彰以  
茲熙皞世舉俗躋樂康胡為古道非極意開邊荒征行

苦鋒鏑飛輓夫耕桑民生既騷屑天和亦乖傷廣土竟  
何益不救危與亡茲事已千載雄豪有秦皇

荆山有美璞巴蜀多名材此物信為竒攻治亦難哉匠  
石得其良寶就成層臺胡為用匪人坐此斲削乖既自  
玉之玷還為木之災而况上天工理代必汝諧餽覆良  
可慮棟撓諒難陪所以虞周聖登庸必賢材

湖邊多楊柳山上多松柏松柏存正性不改青青色楊  
柳易為春隨風發枝節二月絲垂金三月絮飛雪紛紛



冶遊子賞翫不知歇  
松栢寂無言枝幹獨挺特  
空以木自竒不為時所悅  
請看霜霰餘榮悴居然別

時來行堤上春氣薰人心  
宛轉湖山曲隱映花樹林  
芊綿草抽綠蒙茸柳垂金  
鳴鳥何間關纖鱗或浮沈  
生物方總總大化亦駸駸  
當時浴沂者樂意不可尋

混沌鴻濛中伊誰作主尸  
洪河出龍馬清洛浮神龜  
有文粲以別實惟天所為  
悟彼陰與陽契此偶將竒  
大聖發深智運意畫兩儀  
生生之謂易變化無崖涯  
宇宙豈

云大彌綸靡有遺如何千載餘圖象闕莫知卓哉弄丸  
子探源溯希夷從茲識姬孔還應見伏羲伊闕有遺編  
學易真吾師

灼灼春庭樹開花漸離披因思唐虞世日方亭午時大  
禹亦神聖兢兢為保持如何百代下此道久已衰豐亨  
王格之請看大易辭

木腐蟲蠹出氣乖朮贅生曜靈一薄蝕陰曠鬱然興  
道術裂周季縱橫亂秦嬴青牛既夙駕白馬亦時

征汜濫自涓滴熿赫兆星星多謝宋諸老萬古開昏  
冥如何陽光發尚自爍火明寄語行路人勿迷棘與  
荆

萋萋湖邊草榮榮山上花山中有高士探化心靡他天  
地自橐籥萬物從交加深居不窺牖四海皆森羅我欲  
見其人捫蘿陟山阿山阿忽回合冥蒙起烟霞至道復  
誰語奈此高士何

太虛浩無際何所立天堂坤厚大氣舉地獄置何方此

理亦昭哉妄見胡冥茫萬世為之惑福果僥難量高標  
拔地起飛宇就天翔搏刻土木梗鎔劑金銀糝人力為  
殫竭財物亦耗傷既自息吹乖焉得寒暑常茲事自前  
季滔天勢彌張反經如可作興言討彼狂

圓象無停運大化不可留征車既西邁行舟復東流轍  
跡苦相背兩美焉得有青松生澗底白日麗高丘餘光  
不迴照直幹空蕭颼去去莫復道零露滿春草

五陵多俠客三輔足貴豪園池占佳勝高第干雲霄不

惜千金重雅意一日遨綺筵鎮水陸清歌間笙匏酒酣  
視天地泰山一鴻毛中情既昏惑外體亦勞焦誰似林  
居子神理恒超超

在陰鶴相應遷喬鳥當歌琴書滿瑤席良朋亦已多各  
愛芳菲時共惜光陰過齊心何所求所求保太和壯年  
不努力奈此老大何

白雲在高丘綠蘿在深谷中有冥棲士雲蘿蔽茅屋獨  
抱尚友情緬遂碩人軸古琴時復彈古書還更讀逍遙

無外事俯仰長自足沮溺耕在野姜叟釣渭曲伊人豈  
無心恥銜荆山玉將須鳳來儀朝陽滿梧竹

庭前雙榴樹葉密枝相交時當四五月吐花紅天天人  
愛花爛漫我愛花始苞堯夫有妙識造化滿即消情知  
酩酊醉還見離披凋所以大聖人持盈不忘勞吾今老  
學易看花遂成謠

虞帝尚欽恤大禹泣罪人所以聖者心天地同一仁周  
政失其御侯章僭無倫芻靈既莫施作俑亦不聞秦穆

一朝逝歿以三良身臨穴殊慄慄仰天亦悲辛古猶惜  
纍辜如何殺俊民王誅一以失流毒蕩無垠驪山銅重  
泉銀海通幽津遂使三秦衆半作地下塵天道本好還  
羸族亦沉淪因歌黃鳥詩重為仁者陳

迴觀自古來黃金世所急鄙塢幾萬斤梁苑億千鎰貪  
求刻人骨堆積盈家室寧知造化權隨時有消息人無  
長盛年物無不散日金穴竟荒虛金谷亦空寂發塚尚  
有儒胠篋豈無力長見聚金人終為大盜積往者既悠

悠來者方役役旨哉莊生言獨無郢中質

蒿萊不招鳳梧桐不栖鷄物故各有趣高卑焉可齊伯  
夷居東海呂望釣磻溪我我太行巔蒼蔚方朝躋陽光  
燭四表發軔岐山西二老既云往婦子爭扶攜固知賢  
聖人去就關崇卑試聽紫芝歌坐見羸道隳

王良稱善御時方尚詭遇季子洛陽歸張儀關中去佩  
印誇鄉里驅車塞道路說合從與橫而取貴將富孟軻  
陳王道反為迂闊誤已哉無復言遠矣哲王寤



驪珠不易探至理不易論端木稱達者性道猶弗聞五  
十知天命玄聖有遺言區區事末學役役勞其身葩藻  
滅素質聲利迷心源有若亡羊客祗見岐路分何當息  
冥升來復求其根

孤桐生龍門檠絲出東國相合為素琴不離君子側清  
彈何悠揚遺音為發越中涵千古心養彼至人德云胡  
變新聲絲竹異古昔繁響難具論哇淫日淪惑舉俗逐  
時好誰能稱在昔萬事亦復然不獨琴與瑟

吾思一氣大渾渾無邊方天機自流轉隨至互低昂寒  
暑既代序日月亦運行庶物勃然出滿虛各有常萬化  
定厥基終古為維綱大哉庖羲聖有畫象以章易道諒  
斯在請看陰與陽

吾思涑水翁志節一何高褰裳辭宥密視若秋鴻毛古  
人不可作流俗正滔滔色過夏畦病意甚乞墦勞趨走  
信機巧苟得還驕豪閒詠青蠅詩載翫碩鼠交

吾思魯公儀拔葵去織婦傅翼兩其足實惟天道故云

胡世君子大得兼小務  
生殖廣田園  
販鬻罔泉布  
牙籌  
既自執龍斷  
復登顧彼哉  
何足言義利  
各有悟

蝸鳩笑大鵬  
夏蟲疑寒冰  
語之斯道大  
心識何蒙冥  
屬文篋笥滿  
讀書棟宇盈  
徒勞一生力  
了無寸見明  
誰言點也狂  
鼓瑟有深情

月盈乃生魄  
陰極陽復來  
損餘補不足  
天道良昭哉  
淳朴日澆散  
斯理亦何乖  
既剝猶未已  
豐亨尚增培  
君子過佚樂  
小人窮之災  
所願均厥施  
九域登春臺

萬鍾固知富於性無加增千駟雖云衆難為身重輕  
達人抱大觀不以外物嬰夷齊首陽餓伊摯莘野耕清風  
激千古賢聖留其名邈哉務光讓鄙矣蝸角爭蠅營徒  
為爾鴻飛自冥冥

青山何岌岌白雲自超超雲山日在望開門兩相高既  
喜山靜止還愛雲飄颻秀色可攬結吾其陟山椒

大氣浩無涯厚地大氣舉形氣自依附人物乃中處剛  
柔生變化陰陽行寒暑自古謂之然滿虛寧可數吾思

弄丸翁深情契斯語

丹轂既云飾翠蓋亦時張駟馬復在馭鸞和自鳴鏘執  
綏者誰子升車氣揚揚迴旋逐水曲馳騁登周行行人  
為之辟誰不羨輝光胡取覆餗誚而置部鼎章輪輿雖  
云美致寇安可量所以大易辭負乘著厥祥

洪荒日已遠文籍日以繁華僞滅真實汗漫迷本源左  
氏已浮誇戰國皆詐言班馬揚其波蔚宗助其瀾繼者  
如蝟毛美惡愛憎間諒非董狐筆盡信誠為難誰哉法

宣聖大典垂不刊

人生苦不足得隴更望蜀祖龍泛海行劉郎祀竈術仙  
事俱茫茫百年竟飄忽汲汲復營營何時滿所欲吾慕  
首陽翁清風在山谷

庭樹微飄落涼氣始披拂却憶少年時泛舟湖湘曲秋  
風起波瀾寒霜下林麓日出江上楓霧隱楚岸竹蘭芷  
亦蕭條芰荷不秋馥靈均舊遊處騷思方滿目忽忽三  
十年涼意復相觸九歌有遺辭得意在雲谷

庭竹生涼颺明月從東上候蟲草根鳴夜靜聲愈響道  
遙步階除悠然起遐想三皇五帝時淳樸竟焉往王風  
降黍離禮樂委榛莽反復千載間霸業雜相長是非垂  
不泯勝負在俯仰令人意難平撥置聊自廣

人巧千萬端莫逃造化巧三王行仁義子孫永相保綿  
歷百千載順理得終考羸隋南北朝竊國騁暴狡社稷  
旋荒墟苗裔悉剪勦天巧必勝人人巧何足道

出金陵

金陵宿雨霽杲秋日明繆承北闕召促裝出西城追  
隨冠蓋集酌別臨江亭徘徊不能別去住難為情掛蓆  
曉風發解纜早潮生抗手謝送者令人意難平所願各  
努力令德崇端貞

江行三首

石城上朝旭宿霧漸已收大江何茫茫柔櫓泛中流鍾  
阜猶在望白雲散巖幽兩載寧無情湖山憶同遊佳勝  
邈難即迴想空悠悠



順流駕長風掛席何快哉青山若相送兩岸猶崔嵬恩  
召信光渥報稱知非才貞白有君子寧不動中懷

我舟既云邁長風起層波天水共渺茫雲岫紛嵯峩石  
城猶在望赤岸還經過遠堤秋樹小水國蒹葭多老遂  
金陵遊奈此佳麗何北歸已陳跡江行遂成歌

過儀真

忽忽過儀真來往已三度茲行復祇召嚴程還北去湖  
田收晚禾長堤落秋樹已遠金陵山漸近廣陵路乘月

宜舟行牽者且莫住

夜泊廣陵

夜到廣陵城已是三更後  
官舡少停泊驛吏勞奔走  
風清月色明河漢  
粲星斗行思方搖搖  
懷古復何有

高郵

又見高郵城連延傍湖水  
水上紅驛樓登眺憶往歲  
昔逢春雪飛今值秋風起  
歲華與人事迴換理如此  
中貞諒自保期不愧行止

高郵湖

去年冒春雪揚帆過高郵今歲屬秋暮長風送我舟湖  
心射日氣駭浪蹴天浮觀象卦有渙悟易情悠悠

淮陽懷古

淮陽古名郡卧治有昔賢禁闥不可留遺想增慨然顧  
我豈其儔寵擢何連連本乏實德稱重為虛名牽撫心  
益自愧懷人遂成篇

雨中渡淮

風雨渡長淮，波浪何冥茫。  
兩儀混不分，恍若窺洪荒。  
舟人貪利涉，片席就空翔。  
翩翩入烟霧，隨風任低昂。  
北岸泊水驛，暮雨益淋浪。  
且喜對官燭，粲爛竟夕光。

清河晚晴

向夕起長風，秋雲靜天宇。  
清波流月光，白露下寒渚。  
榜人喜晴霽，理楫夜相語。  
早發過鍾吾，漫漫見徐土。

夜上呂梁洪

水村夜寥寥，秋月流空白。  
牽舟上呂梁，逆浪湧寒雪。  
愧

彼役夫勞當此灘水澁憶我四方遊江湖飽涉越祇召  
復茲行恩重知才劣天心復何如長洪石如鐵

過徐州

去年春正月南泛彭城舟今歲值秋暮北上邇長流蹤  
跡信往復景物愜觀遊風寒堤柳落波減岸石稠白見  
高城堞蒼出遠山丘何處戲馬臺彷彿燕子樓化遷無  
停軌事往不可求陳跡竟泯泯虛名但悠悠覽今亦懷  
昔發聲遂成謳

送歐陽憲副

凜凜谷中風，亭亭山上松。  
風聲亦何勁，松自無改容。  
競秀固妍好，弱植徒豐茸。  
獨於霜雪餘，卓然見高蹤。  
悠悠四十年，所遇多尚同。  
歐陽信佳士，亮節抱始終。  
蒼蒼歲寒質，展可為國庸。  
適來述所職，歸思何怱怱。  
載歌君子篇，德期皓首崇。

雜詩三首

洪荒一何遙，悠悠幾萬載。  
古跡竟茫然，古道復安在。  
魏

魏唐帝尊放勳薄四海文明啓中天倫典祭而藹魯叟  
刪述勞于茲立聖軌寥落但陳編撫事增歎慨

孰云天地大形勢兩睽絕一氣周流之神理有昭格雍  
雍虞庭臣穆穆賢聖德太和良在茲疇咨方未歇所以  
祥鳳儀不獨大樂闕如何此道非千古空遺跡

山龍匪舜樂卑菲真禹心大哉虞夏聖憂民同一深既  
服四載勞還彈五絃琴九功亦時敘勅天尚遺音如何  
精一傳載往不可尋獨有簡冊光留照猶至今

西溪魚躍為樂安楊貢侍御題

西溪渺何許乃在楊林阿楊林古名族樂安世其家家  
住溪水曲林木相交加地僻網罟絕溪邃遊魚多戢戢  
聚弱藻洋洋戲新荷逆水微波生仰沫細雨斜跳躍自  
有適出沒靜不譁楊族有名士考業咀英華愛此魚性  
樂輯彼道味嘉乃知天機妙萬象皆森羅却鄙中散慢  
寧效濠梁誇緬懷旱麓詩載賦西溪歌永言繼真躅勝  
景垂無涯



龍江曉望

兩岸青山隱隱一江白浪茫茫烟樹高低城郭風帆遠  
近舟航

遣悶二首

客中鬱鬱不自得忽思古人讀古書古書古人亦如此  
吾懷不放將何如

少時都不解憂喜壯年百慮攪我心我心默默向誰說  
呼酒只對東風斟

臨清曲

臨清人家枕閘河臨清賈客何其多  
停舟落落無可語呼酒只對長年歌

題墨牛二首

青松落陰石苔上雨餘百草芊綿長  
老叟牧牛牛性馴牛背讀書興蕭爽  
書中之味深且長高睨盤古窺皇唐  
日暮驅牛下山去風清月白天茫茫

綠楊芳草被平坡老人騎牛行且歌  
歌長扣角角欲碎

悠悠古意何其多布褐涼風生兩肘幾度歸來月明後  
夜深遺響入青雲應有知音與攜手

蠶婦吟

采葉者誰婦蓬首面不洗年年絲作人家衣短布裙穿  
不拵體綺羅不是養蠶人三復斯言情不已

偶題

磊磊落落塞胸臆推蕩始覺心和平丈夫志量包宇宙  
細故那得風波生

憶繡榮二孫

繡孫猶未識阿翁翁在山東一馬驄  
近別榮孫春又夏相應學語問阿翁

歌

贈劉僉憲

古磬不諧人之耳古瑟不合人之心  
茫茫天地亦大矣人生豈謂無知音  
陽春白雪聽者寡巴人下里和如林  
退之竒崛篇子美爛漫吟謫仙逸氣隘六合一字價抵

千南金神遊八極不可見獨留文字幾千卷江河萬古

行地中飲者杯勺各滿願我生其後欲追逐蹇若跋鱉

趨紫燕

良馬名

東西南北流覽多公取古詞各矜銜邇來

忽遇劉虛菴胸中元氣何潭潭沉酣百子索幽怪模鎔

萬象窮川嵐興來落筆亦何壯一日千里馳風帆又若

秋溟露毫末明珠大貝相錯參始悟古人今可學嗟我

見晚生醜慙虛菴虛菴真竒士磊落聲名固應爾相逢

一曲伯牙琴高山峩峩水清泚

茅屋漏

辛丑進士河汾客早向中州買居宅宅有茅屋八九間  
補葺聊以蔽床蓆進士所好惟詩書衣食取足無剩餘  
朝朝暮暮誦周孔行行坐坐歌唐虞以茲狂僻誤生理  
老屋支撐幾星紀前月大風撮茅去今月久雨漏不已  
移床徙榻那得乾堆書捲被空長嘆文章不足補穿漏  
翻為兒女生醜顏豪家大屋足懽笑已覺紈袴輕儒冠  
却憶唐朝老工部西蜀草堂幾風雨亦有官居鼎鼐尊

欲起樓臺無處所昔賢窮達還復然我何愠此霑濕苦  
且待天晴飽讀書比屋渠渠不須數

太行歌送丁分教之襄陵

太行之山何崔嵬鐵崖翠壁萬仞中天開其勢北來吾  
不知其幾萬里但見橫亘遼磧包括秦晉斗起中原之  
地何壯哉往年吾嘗陟其頂四顧山如培塿樹如苔黃  
河一線遙遙下砥石奔流直到東海不復迴此時英風  
浩然洒六合便欲歷覽天上金銀臺其中羊腸九折走

峻坂摧輪怪石礪礮磊落而成堆太行之高且險也如  
此子今遠行令人興難裁倘到昔所登覽最高處為我  
歌此一曲還徘徊西望襄陵迢迢祇幾驛驅車徑須往  
渡清汾隈願子居易思險慎厥守始終永保令譽慰我  
相思懷

永和雙山歌

永和四境千萬山雙山之勢尤嶺岼兩峰對峙若天闕  
中有一境通人寰南峰突兀半空裏連岫峩峩方並起



蒼松古木何蕭森朔風搜攪鳴不已北峰形狀尤奇瑰  
怪石刻鏤樓與臺上有雲屏立霄漢隔礙星斗迴風雷  
我來登覽值冬暮攀緣石磴到高处滄瀛碣石覺東傾  
弱水崑崙在西顧俯瞰累累岡阜多巨壑無底如盤渦  
遠近幽深杳難測寒雲冷霧紛盪摩因思未闕天與地  
瀕洞無涯惟水氣輕陽一隙漸飄浮大塊無邊遂凝滯  
波濤蕩漾成高低剛為金石柔土泥此山想得陽之極  
層巒削出天之西獨恨古來壯遊者足迹不到茲山下

遂令竒絕委幽窮無由題品繼風雅我才雖非作者流  
愛此欲去還夷猶摩娑石壁寫長句千古當與山同留

鳳凰臺歌次虛菴韻

吾聞鳳鳥不與凡禽棲隆周之時曾集豐鎬西鏘然一  
鳴向人世喧啾百鳥不敢爭與啼昔有名臣黃霸生漢  
世治民之才迥與時流異潁川出守曾幾何休風數感  
靈禽至靈禽文彩明山川和音噦噦聞中天遂築高臺  
表神異臺空鳳去餘千年只今壤埒纔數尺野鳥紛紛

競來集簡冊空存紀瑞年荆榛不復快覩迹我來跋馬  
登高丘荒臺已遠猶回頭為憶循良心耿耿緬懷瑞物  
情悠悠鳳臺鳳臺重披訪往事何須空快悵方今聖明  
治理登俊良會見一朝飛去青雲上

舟中苦熱

大江千里流炎日暑氣波光互蒸濕火雲壓風空不來  
舟中苦熱何太劇坐睡昏昏汗雨流對食欲餐還復休  
扣舷直欲發狂叫安得少昊回清秋安得少昊回清秋

一洗煩熱情悠悠

洞庭湖歌


吾觀庖犧龍馬圖五行惟水居其初自從清濁奠高下  
山澤通氣無時無荆南之水亦衆矣壯觀惟有巴陵湖  
世俗相傳八百里足跡未到空躊躇今秋持節來南楚  
舟泊岳陽訪竒古登樓始得肆遐觀萬頃洪濤際天宇  
如從東岱窺滄瀛一點仙山隔烟雨長風歛起層霄間  
渤渤洶洶增狂瀾轟天揭地急雷鼓排空炫日堆銀山

須臾風止波濤定涵泳虛空開玉鏡金烏飲淵千丈紅  
白鷗落影一行動行客喜甚無氛埃連翩大舸爭往來  
我亦飄然下樓去放舟中流何快哉蜀江西來半天瀉  
瀟湘南接蒼梧野一劍橫空有所之丈夫不作悠悠者  
洞庭洞庭七澤雄鄒魯昔有觀瀾翁我今賦此良不苟  
乃知有本無終窮

沅州春日歌

南州二月春來早綠水青山四縈繞城中何處足春光

御史臺中富花草  
牕外青梅結子稀  
門墻桃李爭晴輝  
映日紅綃正縷縷  
漫空白雪何霏霏  
芍藥錦苞猶未啓  
蘭蓀露葉光泥泥  
楊柳風搓碧玉絲  
芭蕉葉吐青鸞尾  
苔茵展地萱草長  
千紅萬紫遙相當  
竹林好鳥自鳴寂  
菜畦蚨蝶殊悠揚  
生意由來滿天地  
糝點池臺足佳致  
門清祇覺白晝長  
庭閒况復遊絲細  
靜觀元化深無涯  
中心默默含春熙  
願効冰霜達陽氣  
普期八表仁風吹



敬軒文集卷二